

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI MAHDZIR BIN KHALID  
[ PADANG TERAP ]**

**TARIKH : 1 JULAI 2019 (ISNIN)**

**SOALAN NO. 16**

Minta **MENTERI HAL EHWAL EKONOMI** menyatakan apakah usaha yang sedang direncana oleh pihak Kerajaan bagi mengatasi masalah pertumbuhan ekonomi yang perlahan kesan daripada perang perdagangan Amerika Syarikat dan China agar ianya tidak memberikan impak yang besar terhadap ekonomi negara.

**JAWAPAN**

Tuan Yang Di Pertua,

1. Untuk makluman Ahli Yang Berhormat, keluaran dalam negeri kasar (KDNK) Malaysia berkembang pada kadar 4.7% pada tahun 2018 dan menyederhana sedikit kepada 4.5% pada suku pertama 2019. Walau bagaimanapun, kadar pertumbuhan ini masih dalam lingkungan sasaran yang ditetapkan bagi tahun 2019, iaitu antara 4.3% hingga 4.8%.
2. Penyederhanaan ekonomi Malaysia antara lain disebabkan oleh faktor luaran yang semakin mencabar. Antara cabaran tersebut ialah pertumbuhan ekonomi dan perdagangan global yang rendah berikutan ketegangan perdagangan antara Amerika Syarikat dan China yang masih berterusan, ketidakpastian dasar monetari negara maju, jangkaan pertumbuhan ekonomi China dan negara Asia lain yang lebih perlahan serta harga komoditi yang tidak menentu.
3. Sebagai sebuah negara yang mengamalkan ekonomi terbuka dengan jumlah dagangan sebanyak 130% kepada KDNK pada 2018, Kerajaan sentiasa peka dan mengambil langkah proaktif bagi memastikan momentum pertumbuhan ekonomi sentiasa meningkat.

Ini termasuk langkah untuk meneroka produk baharu, khususnya produk yang dikenakan tarif oleh Amerika Syarikat kepada China. Malaysia akan memperoleh faedah perdagangan sekiranya Amerika Syarikat mengalihkan permintaan barangan import berkaitan kepada Malaysia. Impak peralihan perdagangan ke Malaysia akan memberikan peningkatan KDNK sebanyak 0.1 mata peratusan.

4. Selain itu, ketegangan perdagangan ini juga membuka ruang kepada Malaysia untuk meningkatkan eksport komoditi ke China terutamanya minyak sawit yang merupakan barangan pengganti kepada minyak soya dan jagung. Pada bulan Mac 2019, syarikat Malaysia telah berjaya menandatangani perjanjian bernilai hampir AS\$900 juta bagi membekal 1.62 juta tan minyak sawit ke China. Dalam tempoh Januari hingga April 2019, eksport minyak sawit Malaysia ke China telah meningkat hampir 255,000 tan dengan nilai eksport sebanyak RM1.4 bilion.
5. Kerajaan juga akan mengambil peluang untuk mengembangkan pasaran minyak sawit di India berikutan langkah Kerajaan India mengurangkan duti import minyak sawit daripada 44% kepada 40% serta pengurangan duti import minyak sawit proses daripada 54% kepada 45%. Langkah ini telah memberi kesan positif kepada eksport sawit Malaysia yang telah meningkat hampir 480,000 tan

dengan nilai eksport sebanyak RM2.7 bilion pada Januari hingga April 2019.

6. Di samping itu, Kerajaan telah mengenalpasti beberapa strategi ekonomi makro di bawah Kajian Separuh Penggal Rancangan Malaysia Kesebelas untuk menghadapi cabaran ekonomi luaran mahupun domestik. Antaranya termasuk usaha untuk:

- (i) memacu produktiviti pada peringkat nasional, sektor dan perusahaan bagi memastikan pertumbuhan yang mampan dan inklusif;
- (ii) menggalakkan pelaburan berkualiti bagi menerajui pertumbuhan ekonomi;
- (iii) mempergiatkan inisiatif untuk memanfaatkan sumber pertumbuhan baharu termasuk Revolusi Perindustrian Keempat; dan
- (iv) memperkukuh eksport dan menggalakkan peralihan sektor pembuatan ke arah pengeluaran produk yang bernilai tambah tinggi, pelbagai dan kompleks.

7. Di samping itu, seperti yang ditekankan oleh YAB Perdana Menteri, Malaysia juga komited untuk meningkatkan inisiatif perdagangan dan

mengambil peluang daripada ekonomi negara ASEAN yang mempunyai hampir 650 juta penduduk.

8. Usaha bersepadu ini akan meningkatkan produktiviti dan daya saing serta memastikan Malaysia kekal di landasan pertumbuhan ekonomi ke arah mencapai sasaran sebagai sebuah negara maju dan inklusif.

Sekian, terima kasih.

Kementerian Hal Ehwal Ekonomi  
1Julai 2019